

5
DE ASTRORUM

ET PRÆCIPUE

LUNÆ INFLUXIBUS

PHYSICO-CRITICA

DISSERTATIO

IN COLLEGIO NEAPOLITANO NOBILIUM
SOCIETATIS JESU



BIBLIOTECA NAZ.
ROMA
VITTORIO EMANUELE

BIBLIOTECA NAZ.
ROMA
VITTORIO EMANUELE

NEAPOLI MDCCLIX.

Ex Typographia JOSEPHI RAYMUNDI

Superiorum Facultate.

Plus apud nos ratio valeat, quam vulgi
opinio Cic. i. Parad.

I.



Elebris, ac vulgata multum est veterum philosophorum opinio, astra omnia, seu fixa ea sint, seu errantia, non modo suum lumen ad nos transmittere, sed plurimorum etiam effectuum, qui in terra contingunt, causas ef-

fectrices esse; idque Planetis potissimum convenire, ac præ cæteris omnibus Lunæ. Ea opinio, a viris magnis nostris majoribus tradita, satis diu, multumque inveterata hominum animos ita præoccupavit, ut non pauci etiam nunc religioni habeant, lunares influxus, non dicam diffiteri, sed vel in dubium revocare. Lunares dies hac etiam nostra tempestate permulti sunt, qui observant; in quorum numero præcipue recensentur pauci quidam antiquioris scholæ medici, maxime Galenici, tum rustici pene omnes. Hi quædam faciendæ in agris potius crescente Luna, quam senescente, & quædam contra, solemne habent. Illi Lunæ quoque augmenta, vel decrementa contemplantur, antequam ægrotis curandis medicinas adhibeant. Neque desunt alii, qui non ovibus tondendis modo, sed in propriis etiam capillis id fervant instituti, ne tondentes calvescant. Item alia istis similia observant alii.

2. Id hac super re fixum, ratumque penes omnes videtur, Solem nempe multimodis in hæc terrestria influere. Si enim plantæ adolescunt, si frumentum flavescit, si fructus maturitatem adsequuntur, utique a Sole, tanquam præcipua ho-

rum caussa, ea omnia obtinentur. De cæteris vero astris, agant nec ne similiter illa, res in quaestione versatur. Mihi heic placet ab antiqua institutione desciscere, non quod vetera omnia fastidio sint, ac sicuti vestes, ita philosophandi opiniones videantur exolescere, ut queruntur gravissimi antiquitatis patroni; sed quod physicarum rerum notiones non veterum auctoritate, neque vulgi opinione, sed consilio, ratione, experientia metiendas esse, existimo.

3. Ne autem longum faciam plusquam oportet, ea dumtaxat rationum momenta leviter attingam, quibus lunares influxus impugnari, immo etiam convelli, videntur. Quandoquidem, si Luna, quæ proxime terram suam peragit cursum, nihil quicquam in hæc terrestria influere posse, ostenderim; multo minus præstare id poterunt cætera quæcunque astra longissime a terra disjuncta. Id autem, ut clarius ostendam, explicemus primum; oportet, quid sibi velint influxus isti. Porro horum nomine nihil aliud a suis auctoribus significatur, nisi effluvia quædam, seu corpuscula calida, vel frigida, sicca, vel humida, aut alia quapiam qualitate prædita, prout vis fert, & natura ejus astri, a quo manant, & unde ad nos deferuntur. Siquidem ponunt ipsi Saturnum frigidum, Martem calidum, & siccum, Lunam vero apprime humidam.

4. Jam vero, ut ad rem propius accedamus, illud primum objicio, quod nempe ad libidinem omnino fingitur, quidquid de qualitatibus, & natura uniuscujusque astri constituitur. Etenim si
ma-

magna nos occupat ignorantia , quum terrestrium , quæ nos circumstant , naturam inscrutari particulatim volumus ; qui tuto definire idipsum possumus de corporibus Cælestibus tot milliariorum myriadas a nobis distantium , ut alia calida , alia frigida , alia humida nullo tacti falsitatis scrupulo audenter declaremus ?

5. Verum istuc omitto , & naturam qualemcumque velint influxuum patroni , astra singula obtineant . Ut porro intelligamus , Lunam influere , copiosissima corpusculorum effluvia e sinu suo continenter ipsa emittat , necesse est : haud enim aliter id fieri , aut ullo unquam pacto percipi potest . Ex hoc vero aperte consequitur , sua Lunam circumambiri atmosphæra , in quam non secus , atque in nostrâ sit , effluvia coguntur , & nubes , ac nebulae lunares efformantur , e quibus influxus deinde profiscuntur . Quidquod de lunari sensibili atmosphæra dubitatur adhuc ? Quidquod Hugenius , (a) alique non pauci astrorum observatores , nullam Lunæ atmosphæram esse , pro certo habent ? Nunquid certus quidam effectus ex causâ , cujus existentia est admodum dubia , inferri unquam potest ? Hæcine posita rei dubitatione habuerit quicquam influxuum Opinionem pro veritate jam explorata ?

6. At Lunam ambiat atmosphæra gravis , & elastica , in quam vapores , aliæque lunares exhalationes adscendant , ut Wolfio , aliisque quamplurimis visum probabilius est . Quid tum inde ? Nec

(a) *In actis Acad. reg. 1706.*

VI.

idcirco quidquam pro lunaribus influxibus Adversarii concluderent. Quæ enim erit causa, quæ istiusmodi corpuscula ita in altum provehat, ut spatium 60 terrestrium semidiametrorum prætergredientia ad terræ usque atmosphæram pertingant? Num eorundem ipsorum gravitas? Gravia quippe ea sunt: at fatendum omnino est, vim, qua deorsum ferri propelluntur, minime in terram, sed in Lunæ centrum, ad quod pertinent, eam agere debere: alioquin timendum nobis esset, ne lunaria faxa multo iis graviora influxu admodum malefico (Deus meliora): supra nostrum caput similiter conciderent. Num ea ipsa erit causa, quæ terrestria effluvia in altum tollit sive Solis calor ea sit, sive elementaris ignis nusquam non dispersus, sive quælibet alia? Ita sane lunarem atmosphæram, si quæ forte sit, generari intelligimus. At satis novimus, ab ea qualicunque causa nequaquam indefinite, sed ad certam quandam a terra distantiam terrestria effluvia elevari. Nisi forte quispiam opinetur, nostras nubes ita aliquando sursum transferri, ut ad Lunam, vel ad alios usque Planetas perveniant, ibique pluvias efficiant, grandines, ventos, tonitrua, atque alias tempestates: quo quid ineptius dici, aut cogitari unquam potest?

7. Quemadmodum igitur terrestris atmosphære altitudo, unde unde proficiscatur, termino ipsa non caret, sed altius, quam 60 milliaria italica plerumque non excurrit: ita quum Luna sit tellure minor minimum quinquagies, facta proportionem, ipsius atmosphæra milliarium unum, & quinta plus parte excedere non deberet, extra quam lu-

VII.

lunaria effluvia prodire, haudquaquam per naturam liceret. Quid namque rei esset, cur nostræ nubes intra propriam deberent contineri atmosphæram, lunares non item? Una atque eadem est, ut ponitur, utriusque generis nubium elevationis causa. Eadem quoque ipsa corporea effluviolum substantia. Cur, quæso, non eadem utrobique accidentia? Jam vero distantia media Lunam inter, & Terram 60 terræ semidiametris communiter computatur. Nostra itaque atmosphæra, quantum ex iis, quæ modo diximus, intelligere licet, a lunari distat circiter ducentis quadraginta millibus milliariis. Tantundem ergo a nostra atmosphæra disiungitur lunarium influxuum causa. Qui igitur fit, ut, tanto posito intervallo, hæc in illam agat? Credibilis sane foret, si quispiam putaret, ignem apud Indos accensum actione sua ad nos usque comburendos se extendere. Major enim est ignis operositas, quam influxus, multoque minor nos inter, & Indos distantia, quam inter lunarem atmosphæram, & terrestrem.

8. Sed demus etiam, si ita Adversarii velint, (quæ magna satis, immo & nimia concessio est) Lunares influxus miraculo, ut ita dicam, ad nostram atmosphæram tandem aliquando pervenire, secumque ferre noxios, vel utiles pro diverso Lunæ aspectu effluviolum torrentes. Ex hoc nihil pariter est, quod lætemur, nihil, quod extimescamus. (Et sane præsumendum nunquam est, lunaria effluvia, postquam terrestrem atmosphæram forte adsequeuta sunt, more jaculorum libere per aerem excurrentium, nullo opposito impedimen-

VIII.

to, trajicere eam posse. Non enim ipsa sunt corpora firma, & ex duriore quadam materie compacta, sed massa quædam fluidissima ex lunarium corporum expirantium particulis mirifice comparata. Ex alia deinde parte, si aerem hunc nostrum atmosphæricum perpendamus, per quem illa transire deberent; hic quippe non est corpus simplex, & elementare, sed confusum omnis generis effluviis aggregatum ex omnibus corporibus terrestribus emissorum; quorum respectu lunaria illa non solum perpaucæ, sed & quam minima esse deberent; tum ratione exsuperantiæ magnitudinis terræ præ Luna, tum longissimi illius itineris, quod absolute oportere, ut ad terrestrem pertingerent atmosphæram.

9. Jam vero ex hydrostaticæ legibus comperitur est, atque omnibus manifestissime patet, fluidum fluido impositum, dummodo alterum altero non sit specificè levius, vicissim permisceri, implicari, dilui. Qui ergo fiet, ut influxus isti ut primum terrestrem atmosphæram contingunt, itidem cum ipsa non permisceantur? Vel enim eorum pondus illud exsuperat, quod proprium est terrestrium effluviis, vel exsuperatur, vel demum æquat. Si primum; nonnisi ad minimam altitudinem supra Lunam ipsi elevarentur: quoniam si vapores, exhalationesque terrestres, quæ minoris, ut dicitur, sunt ponderis ultra 60. miliaria italica assurgere sursum nequeunt: Qui lunares iis ponderosiores eo altitudinis ascenderent, ut spatium 60. terrestrium semidiametrorum emittentur? Si secundum; terrestrem atmosphæram

VIII.

nunquam trajiciendo pertransirent, sed in ea utrique supernatarent. Si tertium; cum nostra atmosphaera permisceantur, oportet. Si qua ergo in iis virtus adhuc inest, facta hujusmodi permixtione, quisnam dubitabit, eam usque adeo diminui, implicari, & attenuari, ut omnino disperdatur? Id quod eo magis fieri, credendum est, quod lunaria effluvia, si terrestribus comparentur, perpaucissima essent, ut paulo ante vidimus. Numne Spiritus vini guttula aquae dolio permixta vel olet, vel sapit, vel aliud quidquam suae vis amplius retinet? Quamvis igitur permittamus, lunares influxus in nostram atmosphaeram posse aliquando descendere, nihil est, quod vel boni quidquam, vel mali, quum inde in Terram demitterentur, in nos inducerent.

10. Quid ni; inquit fortasse aliquis Cartesii sectator, influxuum phaenomena una sola Lunae pressione explicentur? Suo siquidem pondere aethere sibi subjectum illa premit. Hic tali, ac tanta vi pressus aerem hunc nostrum atmosphaericum, cui superstat, itidem urget. Itaque praeter pondus sibi proprium, quo aer corporibus terrestribus omnibus superincumbit, aliud, & quidem insigne a prementis Lunae vi ipsi accedit. Ex quo facile liquet, aerem eo magis subjecta corpora premere, quo majori pondere & ipse premitur; aerisque pressiones varias ponderibus ipsis eum prementibus, *ceteris paribus*, directe respondere. Quod si animo revolvamus, Lunam non manere in eodem Coeli situ perseveranter immotam, sed tum locum in Zodiaco, tum etiam distantiam a Ter-

ra

X.

ra singulis diebus indefinenter mutare ; facile intelligimus , qua ratione atmosphæræ pondus per Lunam diversimode incumbentem varietur ; quasque vicissitudines corporum terrestrium compressio per dies lunares patiatur . Quæ vero , & quam varia phænomenorum genera in terrestribus omnibus ex varia comprimentis aeris vi inde nascuntur ; res est apud physicos omnes plane nota . Id solum heic meminisse ; juverit ; quod nimia aeris compressio tum plantis , quum omnibus animalibus plurimum obest . Propterea enim fit , ut nihil in fodinis plantarum proveniat ; & in campana Urinatorum , ubi aer ab aquæ vi nimium comprimitur , homines multum anhelantes , & suspiriosi sint , sanguinemque per os , nares , aures miserandum in modum extrudant .

II. Non levia sane verisimilitudinis indicia hæc præ se ferre videtur sententia ; eo vel maxime , quod ex molestia superiorum difficultatum omnium latis scite se liberat . Verum plura sunt , quæ hunc Lunæ influendi modum persundant prorsus . Longe imprimis ab hac Cartesii hypothese de materia ætherea absunt Newtoniani omnes , qui , ne astorum motus unquam retardaretur , per spatium omni materia destitutum , ea revolvi , pro comperto habent . Quum itaque hac nostra ætate nihil aliud privata , publicæque scholæ præter unam Newtoni doctrinam crepent ; consequitur , ut vel nulla sub Cœlo sit Lunæ pressio , vel saltem contra tantos viros , qui eam oppugnant , plurimum suspecta .

12. Sed quidquid sit de memorata Newtoni do-

XI.

doctrina, illud deinde videtur extra omnem dubitationis aleam positum esse, quod aer hic noster vel nulli prorsus Lunæ pressioni subjicitur, vel adeo exiguae, atque insensibili; ut nulli merito æquiparetur: Id quod simplicis barometri beneficio explorare permissum cuique est. Hoc sane instrumento (quod Tubum Torricellianum in laudem inventoris Torricellii alii vocant) inæqualem aeris gravitatem, eiusque ponderis varios vel minimos gradus cuncti exacte metimur. Quum argentum vivum, quod in eo continetur, ab aere inferum recurvati tubi orificium premente, sustineatur; ubi aeris pressio variari contigerit, ipsa argenti vivi altitudo variabitur, adeo, ut quo altius, vel depressoius adscenderit, hoc aeris pressio magis, vel minus valida sit, oportet. Porro autem, quum inter cæteras barometri observationes, quibus in multos menses operam navavi, id quoque explorare voluisssem, num in Pleniluniis, Noviluniis, cæterisque Lunæ phasibus aliqua vel minima in barometro appareret variatio; unde aliam tum esse aeris pressionem forte intelligerem. Rem ipsam loquor, nihil, quod ad hoc spectat, adnotatu dignum in eo animadverti, factaque comparisone inter dies Plenilunii, Novilunii, aliarumque phasium, & præcedentes, & subsequentes dies nullum omnino in iis discrimen comperi; quin, quod super omnia ad rem hanc illustrandam valet; ne ullum quidem variationis signum in eo observavi, sive Luna supra horizon-tem esset nobis conspicua, sive infra ipsum delitesceret. Quid adhuc desiderari potest, ut certo rem hanc,

XII.

hanc , perinde , ut est reapse cognoscamus ? Videtur sane isto clarissimo experimento , omnis de Luna nostrum aerem premente controversia finita jam esse .

13. Demum ne dum falsa ea hypothesis , atque experimentis contraria , sed ne phœnomenis quidem explicandis par esse , videtur . Etenim si influxuum phœnomena nonnisi Lunæ prementis actione perficerentur ; id consequitur , ut quo Luna magis directe , & perpendiculariter terrestribus imminet , eo Lunares effectus uberiores futuri essent , & magis conspicui : tum nanque Lunæ compressionem , si quæ forte existeret , vehementiorem fieri , manifestum est . Constat autem , tempus , quo Luna directius nos respicit , illud procul dubio esse , quo ipsa diurna sua volutatione ad verticem Meridiani accedit ; id quod quotidie perpetuo accidit : non item , nisi rarissime , id tempus obtingit , tum quum sit Novilunium , vel Plenilunium , vel quævis alia Lunæ phasis , ubi , ut dicitur , celebratis influxibus sumus ut quum maxime obnoxii .

14. Una restat via , ut lunares influxus ea vi ad nos perducantur , qua Tellus Lunam attrahit , & cum ea simul lunaria omnia : idque , ut Newtonianis morem geram , si forte unus aliquis ex ipsis sit , qui isti se sententiæ adscripserit . At præterquam quod Cœlestium influxuum defensores de hac via , utpote quæ recens a Newtono deprehensa , seu verius illustrata nunquam ne per somnium quidem cogitarunt : Illud primum in hoc novo præsidio magnopere miror , quod lunarium influxuum , eorumque mirorum effectuum machina ,
quæ

XIII.

quæ pro firma, & inconcussa a suis auctoribus adhuc est habita, tota quanta est, haud alio nunc innitatur fundamento, nisi puri Systematis; quod quidem etsi probatissimum plerisque philosophantium nunc temporis videatur, non est tamen huiusmodi, ut revera ita esse credatur.

15. Deinde si Lunæ influxus per vim Telluris attrahentem ad nos perferrentur, easdem omnino sequi deberent leges, quibus ipsa instruitur Attractio. Verum, si rem hanc accurate perpendamus, longe alias esse Attractionis, & Influxuum leges facile deprehendemus. Quas enim Influxus sequuntur, ea potissimum certis quibusdam Lunæ diebus sunt affixæ. Attractio vero his notissimis legibus circumscribitur: ut nempe *sit materiæ quantitati proportionalis*; utque *ad inæquales distantias sit inverse, ut quadratum distantiae*. Ex quibus id inferre licet, si quantitatem influxuum ad istarum legum normam definire, sit animus, nequaquam secundum Lunæ dies, sed potius pro ratione inversa Lunæ a Tellure distantiae id totum supputandum esse: Quæ ratio, si cum Lunæ phaëbus conferatur, minime iis convenire, facile intelligitur. Motu enim Lunæ generaliter considerato augetur, vel minuitur Lunæ a Tellure distantia pro ratione accessus Solis. Quæ vero lege singulis diebus id ipsum quoque cognosci, & definiri possit? Hoc, ad rem præsentem nihil attinet, atque ad illam pertinet abstrusissimam Astronomiæ partem, quæ motus lunares, eorumque inæqualitates considerat.

16. Postremo huc etiam spectat illud barometri

tri

XIII.

tri experimentum, quod paulo ante exposuimus. Etenim si ea vi, qua Tellus Lunam attrahit, Influxus isto modo deducti ad nos descenderent; atque pro varia ejus attractionis quantitate, quam varii, diversiq; Lunæ adpectus, ut dicitur, designant; multiplices inde orirentur effectus: id, inquam, si forte contingeret, aliquam in nostram hanc atmosphæram mutationem indubitanter induceret. Quandoquidem quum in certis quodam Lunæ adpectu ob majorem attrahendi vim influxus ponitur copiosior, tum atmosphæra solito magis condensetur, oportet. Contra sensibilibus rarefieri, necesse est; ubi in adverso Lunæ adpectu eadem ipsa vis languet, minimusque proinde evadit influxus. Has itaque atmosphærae mutationes; ut dico, indicare utique deberet mobilissimum barometrum, quo varium atmosphærae pondus pro ratione ejus raritatis, ac densitatis quovis temporis articulo ad unguem examinamus. Si ergo, ut supra diximus, facto periculo in singulis Lunæ phasibus, barometrum ne tantulum quidem in iis iminutatur. Id profecto videtur luculenter ostendere; neque per vim Telluris attrahentem, si modo ea revera sit, Lunæ influxus ad nos perducitur. *cap. 17.* At enim incitari nemo poterit; nisi qui plane cæcus fuerit, Lunæ radios, & lumen ubique terrarum diffundi, nocti omnes tenebras collustrare, hostrosque item oculos sensibilibus commovere, ad percellere. Itaque A&u fr̄nos fugiat quæquam utatur Natura via pro influxibus transmittendis; quum tamen certum, exploratumque nobis sit, lucentes Lunæ radios ad nos usque transducere. quid multis

opus

opus est, ut credamus, eos ipsos certam aliquam qualitatem una secum ferre, haustam scilicet a lunari corpore, unde ii modo profecti sunt? Nec deinde mirum, si radii isti naturam veluti per intervalla mutare videantur, & modo nocentes, modo vero innoxii communiter habeantur: quum, & ipsa Luna identidem immutetur. Ut enim missas faciamus omnes illas mutationes, quas Luna singulis ferme diebus successive subit; nemo unus est, qui non advertat, eam ipsam *modo curvatam, in cornua, modo aequa portione divisam, modo sinuatam in orbem, modo immersam pleno orbe, ac repente nullam nobis apparere.* (a) Ex his vero mutationibus, quas præter cæteras observemus, oportet, tres potissimum sunt, videlicet prima, quum Luna Soli conjungitur; altera, quum illi ex diametro opponitur; (quas utrasque Sygiziarum nomine designant Astronomi:) tertia demum, quum gradibus nonaginta a sole distat: scilicet quum in *Novilunio, Plenilunio, & in Quadraturis* Luna versatur: quoniam in his præsertim Lunæ phasibus, quemadmodum nos longus docuit usus, male Luna nos accipit, pravoque suo influxu terrestria omnia veluti inficit.

18. Optimum sane videtur esse expositum argumentum pro diluendis iis omnibus rationibus, quas supra scripsimus, tum etiam pro stabilienda, si superis placet, influxuum opinione. Attamen, nisi me fallit animus, non est ita, non est profecto. Etenim res, de qua agitur in proposito

(a) Plin. lib. 2. cap. 9.

XVI.

argumento, non ita nota est, ut quis per se eam facile intelligere possit. Agitur enim vero de luce, de cujus essentia, ut est occulta, atque ab ipsa natura involuta, non minima disputatio est inter auctores. Ut omittam scholasticorum jam obsoletam opinionem, qui lucem tanquam *accidens* quoddam *absolutum* concipiunt : sunt ; qui cum Cartesio, Hugenio, aliisque compluribus existimant, lucis naturam in corporea quadam fluidissima substantia positam esse, quæ ubique semper ipso quoque noctis tempore diffusa reperitur ; sin autem a solis, alteriusve corporis lucidi præsentia certa quadam pressione, seu agitatione non impellatur, lucis sensum in nobis efficere neutiquam poterit. Quæ quidem opinio, si forte contingat, ut approbetur, suæ enim non caret probabilitate, & vero minime contemnenda, vis objectæ difficultatis in totum concidit : quandoquidem nihil tum quidquam a Luna ad nos transmitteretur.

19. Contra dissentiunt alii multi cum Epicureis, & Newtonianis, qui lucem nihil aliud esse opinantur, nisi perenne quoddam particularum effluvium a lucidis corporibus jugiter emanans, quodque per aeris, aliorumque corporum pellucidorum poros libere transgrediens ad oculos inde nostros fertur, eosque ita percellit, ut lucis sensatio mox suboriatur. Secundum hanc sententiam haud sane diffiteor, lucem ex Luna revera ad nos descendere. At vero non propterea, res pro influxibus judicata jam erit. Id enim primum omnium thei animadvertant Adversarii, velim, prædictam opinionem nullam aliam in se habere certitudinem, præ-

XVII.

præterquam probabilem; quæque proinde ex ea deducuntur nonnisi incerta, ac dubia omnia esse, putandum est.

20. Tum esto Lucis natura perinde sit, ut Newtoniani volunt: ut propositæ difficultati directâ responsione satisfaciam, hac utor distinctione: quod dictum est, lucentes Lunæ radios in Tellurem descendere, non gravate concedo. Quod vero secum ipsi trahant, vel trahere quoquo modo possint aliquod quodpiam lunare corpusculum audacter repugnabo. Quid enim rei luci est cum vaporibus, atque exhalationibus, adeo ut unum ex alio inferre liceat? Nihil quippe novimus, unde ista duo simul conveniant; nihil, quo ultro, citroque inferantur. Num quemadmodum solis lux per totum Cæli ambitum diffunditur, & non modo terram hanc omnem, sed Lunam etiam, atque alios tum *primarios*, tum *secundarios* planetas suo implet splendore, ita putandum nobis est de vaporibus, qui a Terra, vel Luna, vel alio quovis Cælesti corpore emittuntur? Id nullus quidem certe vel mediocriter doctus concedet.

21. Præterea lux per vitrum transit, aliaque pellucida corpora; corporis vero vapor, aut exhalatio non item. Lucis insuper motus perniciosissimus est, & momento quasi temporis ex uno mundi extremo ad aliud fertur; vapor contra nonnisi lento, ac tardo quodam motu ipse movetur. Discrimina hæc tanta, ut de cæteris fileam, satis profecto essent ad ostendendum, aliter de luce, aliter de vaporibus, seu exhalationibus sentiendum nobis esse. Videamus nihilominus, quid hac super re

B

ipsa

XVIII.

ipsa nos doceat experientia. Nonne ex corporibus, quæ sub aspectum cadunt, certa quadam nonnunquam videmus, quæ sunt plane noxia, damnifica, virulenta, quin etiam mortifera? Ita sane. An nostrum quispiam, quum casu illa offendit, veritus unquam est, ne ab illorum conspectu vel pauxillulum inficeretur? Minime vero. Age porro, fingamus animo, Lunam corpus esse natura maleficum, & circumquaque venenatum non secus, ac nostrum toxicum, aut aliquid ejusmodi; qui sit, ut lucis radii, qui a Luna ad nos resiliunt, malum contrahant; qui vero a toxico, vel alio quopiam terrestri veneno repelluntur, non item? Quippe una, atque eadem Solis Lux est, quæ directim terram illuminat, atque Lunam. Eadem ipsa quoque, quæ reflexim utroque ad nos repercutitur, nisi quod repercussionis puncta, quod ad distantiam attinet, quam maxime discrepant; quoniam id, ex quo lux a terra resilit, prope nos est; quod vero a Luna, longissimo a nobis distat intervallo. Unde ergo est, ut qui radii in terræ vicinia nihil admodum veneni ex corporibus trahant, nihil quod damnum nobis inferant secum ipsi asportent; iis deinde ipsis in ea, qua nos a Luna disjungimur distantia, & effluvia de lunari corpore educere, & trahere per spatia pene immensa, & secum ad nos usque perferre, concessum sit? Huccine mens nostra desipuit, ut crederemus, vim aliquam, quæ transferre quoddam corpus non potest ad distantiam paucorum pedum, facile id posse ad distantiam plus ducentorum millium milliariorum?

XVIII.

22. Nihil deinde video, cur variantibus Lunæ adspectibus, & ipsi quoque varientur influxus, adeo, ut qui modo benefici sunt, & benigni, mox in maleficos, & perniciosos vertantur. Id sane qui fiat, nullo prorsus modo intelligo: Nam vel corpus Lunare ita est natura comparatum, ut bonum, aut malum ipsum sit; vel id sibi adjungit ex certo quodam Cœli situ. Si primum: non aliam certe influxus obtinent, ac sui principii naturam. Quocirca aut utilitatem, aut perniciem immutabiliter, ubi Terram contigerint, singulis indiscriminatim diebus nobis adferant, oportet. Si secundum: duobus item modis fingi potest, Cœlum esse conformatum; aut plane vacuum, aut aliqua subtili repletum materia. De primo; nihil laborandum; omnibus enim patet, nullas esse in Nihilo proprietates. De altero; nihil pariter est, quod cœlestis illa materia ulli unquam corpori communicare possit; ut enim optime animadvertit Hieronymus Fracastorus, *Simplex corpus est Cælum, & ejusdem naturæ, & virtutis per totum orbem.* (a) Quid ergo nunc est, quod lunares influxus non modo in singulis Lunis, sed septima quaque Luna naturam veluti mutant, & modo salutare, modo plurimum nocentes existimantur? Non hic videtur manifestior antiquorum error, quam ut pluribus convincendus sit?

23. Quæret fortasse instando quispiam. Nonne Sol in Terram influit? Ita, inquit omnes. Tam enim multa, tamque grandia sunt, quæ heic apud

B 2

nos

(a) Hieron. Fracast. cap. 3. pag. 51.

nos Sol operatur, ut proprie, vereque dicatur.

Sol rerum Sator, & numerosi temporis auctor. (a) Quid ergo est; cur solares radii tanta polleant influendi virtute; quanta percipi potest maxima; lunares vero omni vi destituti nihil prorsus præstare possint? Itaque, ut pro lunaribus influxibus argumenta omnia desint, certe non desunt ipsi lunares radii, qui æque, ac solares in Terram descendunt, sive quidpiam secum ferant, sive non. Siquidem utrique ab eodem, nempe sole, manant principio. Natura igitur conveniunt utrique. Ecqua ergo poterit in utrisque esse tanta distinctio, ut credendum omnibus sit, Solem suo lumine in Terram tantopere influere; Lunam contra ne tantulum quidem suo?

24. Quoniam res huc deducitur, ut nulla alia vi, quam ea, quæ est lucis propria, Luna ad agendum valeat: Lucis proprietates paulum excutiamus, oportet, ut videamus quid, & quatenus, & quomodo lux agat, unde unde ipsa proficiatur. Lucis itaque proprietates præcipuas, quantum huc usque detectum nobis fuit, duas potissimum eas esse, novimus, videlicet *illuminare*, & *calefacere*. Si priorem spectemus, ea nonnisi in animalium oculis agit; horum scilicet retinam suo appulsu afficiendo ita, ut visus sensus in ipsis excitetur, quo objecta extra nos posita videantur. Si deinde posteriorem consideremus, in omnia quæcunque corpora sive solida, sive fluida ea sint, lux agere enimvero potest; non quidem indefinite, sed pro
ra-

(a) *Tibull. lib. 4. ad Messal.*

XXI.

ratione suæ quantitatis, & efficaciz. Nanque in omni re, ut ut actiuosa ea sit, videndum est quatenus: etsi enim suus cuique agendi modus est, tamen magis agit, quod nimium est, minus, quod parum, quod autem minimum, fere nihil.

25. Jam vero quod Lux, seu Solis ea sit, seu Lunæ, vim illuminandi habeat; nulli profecto dubium esse potest: nisi quod vividius interdiu per Solem, quam noctu per Lunam corpora illuminantur. Quod vero ad vim calefaciendi attinet, si de Solis luce loquamur, perspicuum quoque est, eam non calefacere modo corpora, sed incendere etiam, urere, liquefacere, atque in calcem, vel in vitrum redigere: quemadmodum *specula ustoria* solaribus radiis exposita indubiam de his fidem cuique faciunt. Atque hæc una lucis proprietas in causa est, ut quicquid herbarum, plantarum, aut etiam fossilium in terra de novo gignitur, excre-scit, atque ad maturitatem quandam suam usque perducitur; Soli, aut ejus luci, seu verius calori potissimum tribuatur. Id quod luculentissime videre licet in igne, qui si quid agit, præter lumen visum afficiens, utique calefaciendo id agit. Nisi forte quis velit, candelæ flammulam non modo objecta procul posita illustrare, sed aliud quidpiam occultum, atque omnino imperceptum efficere: quo quid incredibilis?

26. Itaque hujusce rei summa posita in eo esse videtur, an scilicet Lunæ radii præter qualita-tem, quæ ad lumen faciendum est apta, alteram illam calorificam in se contineant, quæ nimirum vim calefaciendi habeat. Pro hac autem re defi-

XXII.

nienda, ne quid minus recte constituam, id primum placet ob oculos ponere, quod de Lunaris lucis calore olim senserunt auctores, & quod hoc tempore sentiunt. Franciscus Vallesius fortasse omnium primus, quum verba illa Psalmi 120, *Per diem Sol non uret te, neque Luna per noctem*; hoc ex animi sui sententia scripsit effatum: *Constat ergo haud dubie noctes Plenilunii calidiores, & sicciores esse, quam Interlunii, atque ut Sol per annum, ita Luna per mensem suam astatem facere, & hiemem.* (a). Laurentius deinde Jubertus Vallesii inhærens vestigiis, Solis & Lunæ radios in unum conferendo, suam quoque dixit sententiam in hæc verba: *Erit itaque ex Lunæ splendore simul caliditas, & siccitas, nisi quid impediatur, & ipsa, quum plena erit, nos integro vultu respiciens calfaciet, & exiccabit.* (b) His demum assensus quoque est Joannes Wepferus, qui pro sua parte etiam ipse decrevit, *Lunæ radios esse calidos in infimo gradu.* (c) Convenit itaque inter hos auctores, Lunæ radios non modo lucentes esse, sed suum etiam calorem habere. Recte, an secus id definiert? posterius istuc videbimus. Interea ad alios pergamus.

27. Contra Christianus Garmannus, ab istis longe dissentit, quin etiam, quoad potest, persuadere conatur, Solis radios ut ut ardentissimos, si tamen contingat, ut in Lunam incidant, derepente congelari, & nonnisi congelatos inde ad nos per-

(a) *Franc. Valles. de Sacr. Phyl. pag. 575.*

(b) *Laurent. Jubert. de Paral. tom. I. pag. 332.*

(c) *Jo. Jacob. Wepf. de Apopl. pag. 260.*

XXIII.

pervenire. *Ex hoc*, inquit, *fit*, *ut in Plenilunio majus frigus seuzimus*, *etiam æstivo tempore*, *imo circa canicularium æstum*. (a) Garmanni dictum Stephanus Spleisus factò etiam confirmavit. Is vitreum vas aquæ plenum in Luna exposuit, quum ea plena erat; tum paucis post horis, quum aquam iterum perscrutaretur, congelatamprehendit. (hibernone, an æstivo tempore istud fecerit periculum; hujusce rei auctor non meminit) Ex quò indubitanter conclusit: *Lunæ radios non debili calore infectos, sed potius insigni frigefaciendi facultate præditos esse*. (b) Non secus opinatus est Kenelmus Digbæus, (c) nisi quod de suo nonnihil novi addidit, lunares videlicet radios non frigidos modo esse, sed & apprime humidos: id quod ex certo quodam satis obvio experimento intellexit. Argenteum malluvium intus læve, ac probe mundum sub dio in Luna expositum locavit; tum longo post tempore ad malluvium revertens, totum humefactum animadvertit. Proh mirabile experimentum!

28. Age nunc, hæc sunt de lunaris lucis efficacia auctorum judicia, quibus mens veluti in transversum rapitur: quum alii admodum calidam, & siccam, alii contra humidam, & frigidissimam eam esse existimarunt. Eat jam quis, & ex alio-

B 4

rum

(a) *Christ. Garmann. de mirac. mort. lib. 3. tit. 1. pag. 862.*

(b) *Apud Jo. Jacob. Wepf. de loc. affectis in Apopl. pag. 260.*

(c) *Kenelm. Digb. de pulver. Sympat. pag. 91.*

XXIII.

rum sententia lunarium radiorum mensuret potestatem; simulque pro certo habeat, eos non secus, ac solares utraque tum illuminandi, tum calefaciendi vi præditos esse. Nunquidnam in tanta opinionum varietate; hominumque dissensione non-nihil certi deducere quisquam poterit?

29. Quid quod id temporis jam sumus, ut quemadmodum ista se res habet, amplius dubitare non liceat. Etenim clarissimis experimentis satis constat; Lunæ radios omni quocunque tum caloris, tum frigoris gradu omnino destitui. Ne multa, hæc in primis habet Hermannus Boheravius: *Egregius Britannorum philosophus, factus a natura ad experimenta physica ingeniosissime capienda, Robertus Kokijs plenæ Lunæ radios convexo utrinque vitro in focus adegit, eo effectū, ut lux ibidem charta excepta foret fulgentissima, quum interim directus hinc focus in Thermoscopium mobilissimum, ne minimum quidem signum caloris, ignisve præberet. Quod vitra Ischirnhausiana Parisiis confirmarunt postea: Act. Acad. Scient. 1699. pag. 110. (a) Paucis post annis, anno scilicet 1708. ad normam istius experimentum repetens D. de la Hire, nihil profecto minus animadvertit, quam quod paulo ante dictum est.*

30. Ego ipse, utpote qui sic sum, ut aliorum testimonio præsertim in rebus physicis minime fidam; iterum, ac sæpius hujusce rei periculum facere volui. Itaque adhibitis pro experimento accurate

(a) *Apud Herm. Boher. tom. 1. elem. chym. pag. 67.*

rate capiendo duobus Thermoscopiis ; altero Romuriano, Farenheiciano altero ; utroque, supra quam satis est, mobilissimo : quum Lunæ plenæ radios per simile vitrum in focus adegissem, atque unum primum, tum alteri Thermoscopio prædictum focus admovissem : nunquam profecto accidit, ut opinionem fefellerit rei eventus : quin maxima cum voluptate spectavi ; aliisque etiam spectandum præbui ; nullum omnino neque caloris, neque frigoris gradum, vel minimam hujus partem in iis designatam unquam fuisse. Satis igitur superque constat, Lunæ radios omni quum caloris, tum frigoris gradu prorsus esse destitutos. Quandoquidem, si ii, etsi densati, atque in focus collecti nihil admodum in Thermoscopium agunt ; quod sane instrumentum ad omnem vel caloris, vel frigoris gradum, quantuluscunque is sit, sensibilissimum est : quomodo iidem ipsi nequaquam densati, sed nimium rarefacti agere quidquam poterunt in alia quæcunque corpora, & quidem firmissima?

31. Roget quis, quid est, quamobrem solares radii, quum per Lunam ad nos reflectuntur, calore ita deficient, ut nullo is possit detegi artificio? Scilicet id contingit, non quod lunare lumen, si hujus spectemus naturam, calore omnino careat, sed quod ob reflexionem maxima interveniat luminis raritas. Quamvis enim Lunæ lumen non aliud sit, atque Solis lumen ad Lunam missum, atque ab ea iterum ad nos repercussum ; attamen in hujusmodi repercussione eo usque rarefescendo deficit, ut tandem sensu calefacere omnino desinat. Quomodo vero, quum id Luminis a Luna ad nos re-

XXVI.

repercutitur; insignem hanc adipiscatur raritatem; haud quaquam hoc est explicatu difficile.

32. Porro in luminis reflexione illud in primis Catoptrica nos docet, quod quum lux in corpus seu solidum, seu fluidum incidit; intelligere licet; eam in tres veluti partes continuo dividi; quarum una regulariter illo regeritur; unde digressa est: altera, sine lege reflectitur, se quoquoersus dispergens ob superficierum, quas offendit, inæqualitates, quum earum nulla reperitur, quæ sit perfecte lævis: tertia denique lucis portio in superficierum contactu plane extinguitur; vel quod contactæ corporis partes molliores sint, minusque propterea ad repellendum idoneæ; vel quod in ipsiusmet corporis poros penetrans, ibi penitus absorbeatur. Ecce autem, quomodo in quacunque data luminis reflexione, radii hujus reflexi pauciores, & propterea rariores fiunt, quam directi. Atque hæc quidem consideranda occurrunt, quum corpus reflectens regulare est, & quoad potest, politum. Quid si illud asperum sit, atque extra regulam positum? Quid si non modo asperum, sed etiam insuper convexum? Scilicet in utroque radii reflexi magis, ac magis decrescunt, multoque magis proinde rarefiunt. Super omnia vero maximam ad rarum faciendum vim habet corporis reflectentis convexitas; quæ quam valde ipsa per se radios incidentes *parallellos* in *divergentes* mutat, & vertit; satis clare id intelligunt, ac demonstrant *Catoptrici* omnes.

33. Quum igitur Luna globosa sit, ejusque superficies convexa non lævigata, & polita, sed aspera,

XXVII.

ra, & inæqualis, ut observationes per tubos opticos institutæ certos de hac re nos faciunt: & præterea in tam magna circumferatur a Terra distantia, quæ quidem ad disperdendos quoscunque radios tum reflexos, tum directos plurimum valet: nil profecto mirum videri debet, si tot tantisque rarefacientibus causis in unum concurrentibus, Lunæ lumen perquam rarum esse deprehendatur, adeo, ut nullum vel minimum caloris signum, quocunque etiam adhibito artificio ostendere unquam potuerit.

34. Rem hanc omnem clarissime tenuit Cl. Bougherius, (a) qui nonnulla etiam adhibuit tentamina ad explorandum, quamnam haberet rationem lunaris luminis densitas cum solari comparata: ex quibus intellexit, illius densitatem, dum Luna pleno fulget orbe, esse ad densitatem luminis solaris, prout id in Terræ superficie sentimus, ut 1. ad 300000. Jam, hoc posito, vitrum illud ustorium maximum, quo Parisiis, ut supra dixi, usus est de la Hire, non plusquam trecenties sexies Solis radios in foca densiores efficit: Tantundem ergo Lunare lumen, per hujusmodi vitrum in angustum coactum, effectum densius est. Veruntamen multo adhuc rarius esse deprehenditur, quam ipsum solare lumen in terræ superficie. Etenim 306. fere millies continetur in 300000: Lunare ergo lumen eo modo per vitrum densatum adhuc millies fere rarius est, quam ipsum solare

(a) *Essay sur la gradation de la lumière*
sec. 1. §. 7.

XXVIII.

lumen in terræ superficie. Tanta autem isthæc est luminis raritas, ut si forte in ipsos radios solares atiquando induceretur, & ipsi quoque, perinde, ac lunares, omni sensibili calore forent proculdubio destituti. Hactenus potissimam lucis lunaris oppositionem pluribus, & particulatim sum prosecutus, quod ea majoris momenti esse, totumque fere, quod in controversia est positum gremio suo complecti videretur: Cui, nisi mea me fallit opinio, optime, & plus etiam quam oportebat, satisfactum est. Illud restat, ut quæ pro Lunaribus influxibus experimenta adferuntur, æquo animo, ut par est, discutiamus.

VULGATA INFLUXUUM LUNARIUM EXPERIMENTA.

35. Me jam provocant illi non pauci, qui rationum momenta, quæ hactenus exposuimus, nihili facientes, rem hanc omnem potius, quam ad rationis, ad experientiæ tribunal deferri volunt. Verum nullus unquam finis, aut modus huic rei foret, si non modo singula, sed celebriora solum experimenta, quæ ad Lunam pertinent, complecti vellem, quibus viri ceteroqui sapientissimi opinionem de influxibus evidentissime comprobatam esse, putant. Modice igitur hoc faciam: omniaque ad tria veluti summa capita paucis reducam. In quorum primo id potissimum expendam, quod circa hominum morbos, eorumque curationes divulgatum est. In altero, quod in piscibus, præsertim echinis, aliisque testa munitis observatione,

XXVIII.

ut ajunt, perpetua deprehensum est. Demum in tertio illud discutiam, quod circa arborum plantationem, infitionem, cæssionem rustici observant.

36. Ut a primo exordiamur, neminem fugit, medicorum plurimos fuisse, & hoc etiam tempore nonnullos etiam esse, qui venæ sectionem, alvi purgationem, atque aliam quamlibet per cutis poros, aliasque glandulas excretionem, qua die Luna vel Corniculata, vel dimidia est, nefas esse, arbitrantur, idque certo in hac re delinquentium malo comprobatum esse, ostendere conantur. Alii vero fortasse paulo indulgentiores isto animo sunt, ut sanguinis missionem quacunque crescentis Lunæ die indiscriminatim præscribant, nunquam decrescantis. Contra Etmullerus hæc habet: *Luna crescente potius, quam decrescente, contra vulgarem opinionem, ut optime ostendit Abdias Trevo. in pract. universali, in qua quasvis purgatorias evacuationes, Luna decrescente; sanguinis vero, Luna crescente, esse instituendas deducit.* (a) Quosdam præterea novimus, qui quidquid Luna in singulos menses suo influxu operetur, nihil admodum sunt solliciti; at Lunam Martiam plusquam pestem odio habent. Proh miseros ægros, qui in istorum medicantium manus eo tempore fataliter incidunt! Scilicet nulla eis conceditur sanguinis missio, nulla ad ventrem solvendum salutaris purgatio, nullum denique ad sanitatem restituendam opportunum, & cæteroquin satis obvium medicamentum. Sed quidquid mali ferunt, patienter ferendum ipsis est;

(a) Etmull. tom. I. ar. I. de Pleth.

donec Luna lustrato suo cursu Solem iterum consequatur.

37. Illud primum ex his medicinæ professoribus, si fas esset, libenter percontarer, an suis ipsi dictis fidem habeant? Difficulus enim, atque admodum ægre ad credendum inducor, tantos viros cæteroquin doctissimos animum induxisse suum, ut ista sibi persuadeant. Verum sentiat quisque, ut libet, de intimo istorum animi sensu. Ergo, si est ita, ut dicitur, priusquam medici ægros adeant, ephemerides ipsis consultandæ erunt: ut nempe ex illis quotidie discant, quotus Lunæ dies ille sit, in quo versantur, quotoque die, temporisque momento futurum sit Novilunium, Plenilunium, vel alia quævis Lunæ phasis. Numne est hoc in more positum, institutoque medicorum? Scilicet, si perpaucos excipiamus, cæteri omnes ne quærere quidem de ephemeridum nomine vel minimum laborant. Sed mittamus hoc: & quoniam provocato ad experientiam iudicio, isthæc lunaris medendi ratio unam habet experientiam, ut ajunt, matrem, & magistram, videamus quid hac super re vel vulgus ipsum observat. Notum quippe cuique est, multo plures eos esse, qui antiquorum præjudiciis exuti, quum hominibus medentur, ad prædictam lunarem legem, quasque superstitionem nequaquam animum attendunt. Sed quemadmodum quotidie, imo quavis diei hora in morbos delabuntur homines, ita prout fert morbi qualitas, nullo facto dierum discrimine, & sanguinis missionem celebrari jubent, & remedia ad alvum dejiaciendam continuo præscribunt. Neque vero proinde

de

XXXI.

de in ægrorum restituenda valetudine minus secunda utuntur. isti fortuna., quam ii, qui in medicina facienda ad Lunam, atque ad ejus phases animum adjiciunt.

38. Quid quod homines Angina, Pleuritide, Apoplexia, febribus inflammantibus, atque aliis gravioribus, acutisque morbis in diem afficiuntur? Hi sane morbi, quum ingruunt, tales sunt, qui vel brevi tolluntur, vel ipsi tollunt. Quid, quaeso, faciendum in istis erit, si forte crescente, hoc est adversa Luna contigerint? Cunctandum ne erit, donec Luna decrescat, ne mala sua influentia sanguini tum mittendo noceat?

39. Ad rem respondet heic Etmullerus: *Quoad necessitatis vero tempus, omni lege hoc ipsum caret: adeoque tunc venit sanguis mittendus, quando necessitas, & symptomata urgentia postulant.* (a) In his ergo casibus gravibus, periculosis, & repentinis vel ipsi lunares medici, nullo habito ad Lunam respectu, eodem die, eademque hora, qua morbus ingruit, venam illico aperiri, imponunt. Jam illud rogo: Interea dum sanguis aperta vena effluit, quid tum erit de Luna? otiabitur ne illa, an dormiet? An potius ægrōti miserans malum se ab influendo cohibebit? Imo vero tum maxime exitium ægroto adferre deberet, quum humores omnes nimium sunt perturbati; separationes per glandulas quamplurimum impeditæ; secretiones item cuticulares omnino suppressæ. Malum enim vel minimum, quod graviter ægrotanti, & morti ferme pro-

(a) *Ibidem loc. cit.*

XXXII.

proximo infertur , maximum proculdubio putandum est . Vel igitur dicendum , ea tum a medicis præscribi medicamenta , ut ægrotus ante dies occumbat suos : id quod ne suspicari quidem licet : Vel verius nihil nobis , nostrisque corporibus cum Luna rei unquam esse .

40. Quod vero ad Lunam Martiam attinet nihil profecto video , quamobrem odio tam immani quibusdam sit , ut quidquid mali per eos dies acciderit , id omne illi , tanquam hosti nostrorum corporum insensissimæ haud dubie adscribant . Quæ , malum , est ista tanta cum Luna Martia inimicitia , atque malevolentia ? Annon una , atque eadem Luna est , quæ oritur , quæque occidit mense Martio , atque illa , quæ per totum annum usque revolvitur ? Annon quovis indiscriminatum mense movetur Luna in Plano ad Eclipticæ Planum inclinato ? Annon Martio æque , ut cæteris quibusvis mensibus easdem omnino subit Luna mutationes tum crescendo , tum defectionibus ad initia recurrendo ? Quid ergo est , cur Luna Martia , quamvis non Cœlum , non iter , non phases mutet ; tamen ipsa ex bona in pessimam mutetur ? Num tunc temporis Luna ægrotat , irascitur , insanit ? Ecquisnam hoc dixerit ?

41. Non negaverim tamen , Martio , & circa eum mensem hominum ægritudines frequentiores esse , & plerunque periculosiores , nec non valetudinarios , & præcipue senes in summum vitæ periculum , ac discrimen haud raro adduci . Id autem potius ad Cœli intemperiem , quam ad Lunam referendum esse , ratio ipsa nos admonet . Etenim

con-

constat, eo potissimum tempore, ob magnam fortasse diurni caloris, & frigoris nocturni inæqualitatem, tempestates crebriores fieri; quibus procellæ, turbines, grandines, tonitrua, & quivis alius Cœli inquietior status adversus nos concitantur: Quæ quum contigerint, quantum detrimenti inde capiat hominum sanitas, nemo est, qui id ignorat. Prædictos itaque medicos etiam, atque etiam rogo, ut in restituendam agrorum sanitatem sedulo incumbant, eorumque curationes quandoque, vel Martio tempore citra metum suscipiant; utque omnem de Luna submoveant scrupulum, quoniam

Exclamare liber: non est hæc improba non est, (a)

42. Expendamus nunc morbum illum, qui Lunæ influentiam ex vulgi opinione mirifice comprobare videtur. Is inter notissimos est, & morbus *Major, Sacer, Caducus, Comitialis*, atque aliis pluribus nominibus olim appellatus est. Nunc communiter *Epilepsia* nomen habet, qua totius corporis constitutio convellitur, atque vexatur. Hujus sane morbi, quo non raro corripuntur homines, præsertim pueri, non mulierculæ modo, sed viri etiam docti Lunam criminantur; adeo, ut *Lunæ malum* vulgo etiam dici soleat: quod fama est, in Noyiluniis, & Pleniluniis potissimum invadere, vel secundum Lunæ conversiones. Neque vero desunt magni nominis auctores, qui id expresse docuerint, inter quos non infimum tenet locum doctissimus Etmullerus, quem supra semel, atque ite-

C rum

(a) *Maximil. lib. 10. epigr. 28.* ()

XXXIII.

rum honoris causa nominavimus; qui veterum opinionibus plus æquo fortasse addictus, in eo etiam hallucinatus est, ut id quoque crediderit, quod *in primis Lunæ motibus auscultat Epilepsia quævis, magis tamen ea, quæ est per essentiam, & nonnunquam ad Lunæ varias periodos diversissime afficit.* (a)

43. Verum id primum in transcriptis Etmulleri verbis procul a veritate abesse, certum habemus, quod *Epilepsia quævis auscultet Lunæ motibus*. Sæpe enim numero contingit, ut Epilepsia inducatur ob aspectum phantasmatis, spectri, aut alterius cujusvis objecti deformissimi; tum etiam ob aliquam stomachi ad vomitum ex gravi odore perturbationem, & concitationem. Atque, his quoque detractis, Epilepsiam adhuc excitare solent quidam animi affectus subiti, vehementes, & concitati. Id quod omnes ad unum testantur medici; ac ne iple quidem contradicit Etmullerus: *Eadem illustrent diversi animi affectus graviores v. g. Ira, terrores nimii, & similes, qui spiritus animales nimis exagitando Epilepsias subitaneas non raro inducunt* (b). Hæc certe quidem nihil est, quod Lunam incusemus: quandoquidem illa tanti non est, ut præfagire quoquo modo possit, quæ repentino aliquo casu hominibus accidant. Non ergo quævis Epilepsia cum Lunæ motibus congruit.

44. Totum itaque Lunæ negotium in efficiendis, moderandisque Epilepsiis, ad eas dumtaxat redigitur, quæ *essentiales, periodica, & idiopathica*

(b) *Etmull. de Apopt. prax. lib. 2. art. 1.*

(a) *Idem ibidem paulo ante.*

XXXV.

æ nuncupantur . In quibus Luna teterrimo suo influxu , ut ajunt , veluti domina dominatur . Sed quod ne istæ quidem ullo unquam pacto Lunæ subjiciantur ; vel ex hoc intelligi facile potest , quod in indaganda morborum periodicorum causa medici fere omnes hærent , & suspensi esse videntur . Et sane non Epilepsiæ modo statis temporibus ad id , unde discesserunt , quasi facta periodo , revertuntur ; sed febres etiam tertianæ , quartanæ , quintanæ , podagræ , vertigines , apoplexiæ , atque alii permulti sunt morbi , qui certis quoque quibusdam temporibus abeunt , & quodam quasi circuitu facto , rursus redeunt . Non raro etiam fit , ut id genus morbi anteaactam periodum minime servant , sed extra ordinem vel ante , vel post tempus jam constitutum ex improviso recidant , ut propterea *Anomali* appellentur . Jam vero , quum inquiritur , unde regressio ista morborum , seu periodica ea sit , seu anomala , originem ducat : non una quidem , sed multæ sine discrimine culpantur causæ ; succorum scilicet , vel glandularum vitia ; viscerum , seu spirituum animalium morbositas ; atque etiam cerebri pressiones per arteriolas sanguinem non satis comminutum ferentes ; atque aliæ similes istis , in quibus cæco quodam modo per ambages , & trivia eundo tanti mali internam causam reperire , medici conantur .

45. At quod ad externam attinet Epilepsiarum causam : si ulla res est , quæ talium quorundam morborum externa causa dici revera possit ; ubivis tutius , quam in Luna sine ulla controversia reperjerur .

C. 2. () Hip.

XXXVI.

Hippocrates profecto nihil tale quicquam de Luna cogitavit; quin de causis morborum externis universim verba faciens, in temporum varietates eas omnes rejicit: *Mutationes temporum maxime pariunt morbos, & in temporibus magnæ mutationes caloris, & frigoris, & reliqua juxta rationem hoc modo* (a). Cur autem sic opinetur, rationem ipse subjicit: *Quum una cum corporibus, & ventriculi moventur in hominibus* (b). Notum quippe clarissimo viro erat, motus quoscunque externos ab internis insensibilibus jugiter comitari, qui quasi conspirando, iis quodammodo obsecundant.

46. Atque ut aliud ex alio, certum hinc mihi est; non aliam, atque istam rationem esse, cur maris fluctuatio nauseam, & vomitum navigantibus plerunque creet. Siquidem, mare ventis exagitato, navigium, & quæcunque in eo vehuntur similiter exagitantur, & fluctuant: ex quo fit, ut commotis hunc in modum corporibus, & eorum ventriculi eadem ipsa commotione commoveantur, & perturbentur; & propterea naturaliter in iis convulsio consequitur, atque ad vomitum incitatio. Haud vero secus, quum mare hoc nostrum acreum, in quo perpetuo vivimus, ventis modo calidis, modo frigidis pro vario solis positu indefinenter agitetur; corpora item nostra aereis veluti fluctibus agitata, & ipsa agitentur, oportet: Omnia proinde viscera, glandulæ, muscoli, fibræ, atque id omne, quod in humani corporis structura Anatomici

(a) Hippocr. de aere, & locis sec. 2. n. 310.

(b) Idem sec. 3. Aphor.

XXXVII.

mici *Solidum* vocant, quodam quasi æstu commoventur, atque ita perturbantur, ut sublato in iis proprio cujusque elaterio, atque apta omni inter se commissura ex parte resoluta, tollatur etiam consentanea liquidorum pressio, & quæ ab ista dependet partium, e quibus constamus, discors concordia, & perfecta veluti harmonia, in qua status nostri corporis actiones omnes suas probe obtinentis consistit.

47. Quod generatim de causis morborum externis vir summus opinatus est, id speciatim sensit de Epilepsia, cujus externam causam omnem ventorum vi potissimum adscribit. *Ceterum in mutationibus ventorum propterea morbo sacro corripiscens, maxime quidem austrinis, postea vero aquilonaribus, deinde etiam reliquis ventis; hi autem sunt, qui fortissimi ex ipsis existunt, & inter se tum statione, tum viribus contrariissimi.* (a) Nunquidnam heic, quod Lunam, ejusque pravum influxum refoleat, habetur? De industria Hippocratis auctoritatem medici omnium excellentissimi, cujus libri ubique celebrantur, heic adducere fuit animus; primum, ut neminem lateat, opinionem hanc nostram summæ tanti viri auctoritati innixam esse: deinde, ut omnes intelligant, nos ista, quæcunque sint, non oppugnandæ antiquitatis causa scripsisse; quid enim Hippocrate antiquius? sed potius studio, & amore veritatis, quo dumtaxat, absit verbo invidia, ad opinandum movemur.

48. Quæ deinde proferunt Adversarii experi-

(a) *Hippocr. de morbo Sacro n. 266.*

XXXVIII.

menta, quibus probare nituntur; Epilepsias periodicas ad Lunæ normam, & motum adamussim respondere: id quam vanum, & futile sit, vel ex eo fit manifestum, quod aut totidem, aut plura sunt opposita experimenta. Et sane ex pluribus observationibus hac super re a cl. viro Francisco Torti institutis, id solum innotuit; quod ad stabiliendum levamen certum in morbis istis herculeis, paroxysmos inæquales, & modo semel in anno, modo bis in mense, vel etiam in die recurrentes, habentibus, requiri perseverantiam plurium annorum. (a) Theophrastus Bonetus vir præclarissimus, atque in arte medendi haud ulli secundus luculentius rem hanc ita definivit: *Nunc subjungemus Epilepsiam periodicam non ad menstrua Lunæ intervalla, sed singulis diebus aliquoties recurrentem, imo similem Epilepsiam periodicam narrat Theod. Kerekingius observ. II. pag. 142. (b)*

49. Demum, ut cæteros præteream, doctissimus noster Cirillus idipsum non modo comprobat, sed isti controversiæ finem quodammodo imponere videtur: *Menstruæ, inquit, Periodi, an a Lunæ influxu dependeant, vel ii sciunt, qui, etsi Astronomiæ ignari illud notant, Periodicos morbos omnibus indiscriminatim mensis diebus, quacunque Lunæ phasi, sive illa crescat, sive decrescat, sive nova, sive vetus sit ægrotantes affligere. Sed prætermittamus hæc tanta præclarissimorum virorum testimonia, quæ*

(a) Franc. Torti Med. Mutinen. pag. 687.

(b) Theophr. Bonet. Medic. Septentrion. pag.

XXXVIII.

quæ illi ipsi experientia, quam sibi Adversarii tribuunt, omnino refragantur. Illud certe prætermittendum non est, quod in hac amplissima, & populosissima civitate nullus fere dies est, quin aliquis Epilepsia corripiatur, vel alias correptum ea iterum vexet. Cui rei testimonio esse quidem possunt omnes quotquot sunt, qui heic medicinam exercent. Jam, his positis, nonne pudet testem producere experientiam, ut probetur, *In Noviluniis, & Pleniluniis Epilepsias invadere, vel secundum Lunæ conversiones?*

50. Quod si forte aliquando acciderit, ut nonnulli tali morbo affecti iterum, ac sæpius in Noviluniis, vel in alia quavis Lunæ phasi corripiantur, adeo, ut morbi periodus illum ipsum lunarem cursum revera sequi videatur: Id tanti non est, ut negotium vel minimum nobis facessat. Etenim morbos, qui certam quandam periodum habere visi sunt, pene innumeros artis medicæ periti recensent. Quemadmodum ergo alienum ab omni ratione prorsus esset, si Martem, vel Saturnum, vel quodvis aliud Cæleste corpus quis præficeret, quod Tertianæ, Quartanæ, aliisque periodicis morbis suo influxu præesset: & risum profecto moveret, qui ad quotidianam alvi evacuationem periodicam explicandam, diurnam Solis, Lunæ, Veneris revolutionem adscisceret: Ita ridiculum plane videtur esse, quod quidam pro Epilepsiarum periodico cursu indicando, ad Lunam tanquam *humorum dominam, & Cerebri Præsidem confugiant.*

51. Forte non deerunt, qui heic opponant Lunaticum illum in Evangelio relatum Matt. 4. c. 24.

Cap. 4. c. 24. Mi-

Mirum quantum quidam ex Adversariis in hoc facto exultant, ac pene triumphant! Quandoquidem ob id lunarium influxuum opinionem non experientiæ modo consentaneam, sed divino etiam oraculo confirmatam existimant. Auctoritas hæc tanta veluti insuperabile quoddam propugnaculum mihi quondam hæc de re disputanti non semel opposita, & objecta fuit. Satisne, atque ad rem responderim? Nescio. Id unum certo scio, me fortiter quidem certe respondisse. Non quo divinum verbum pro libito interpretari temere præsumserim; verum quia, quum ex D. Hieronymi, aliorumque sacrorum interpretum sententia, virum illum Evangelicum potius dæmoniacum, quam lunaticum fuisse noverim: nihil profecto extimescens, quo me citius ab eo textu expedirem istuc idem fidenter reposui. Nunquidnam heic, quod displiceat, animadvertitur? Attamen nescio qua adversa fortuna, nihil placuit minus.

52. Ne vero vel tum imposuisse, vel nunc egregie imponere videar: en eruditissimi Calmet verba: *Evangelii lunaticum plane Energumenum putat Hieronymus Matt. 4. c. 24. quum populus falso lunaticum credidit, quod in lunationibus majori furore actum videret; Dæmon enim iis præsertim temporibus miserum angebat, ut, quum morbum simplices in Lunam referrent, & inde Creatorem blasphemandi occasionem assumerent* (a). Isthæc etiam interpretandi ratio Martino del Rio potissimum probatur, quippe de illo loquens: *Non quod, inquit,*

(a) Calmet diction. Biblic. v. Luna.

quit, *Dæmoniacus non esset, sed quod, & a Dæmo-
ne obsideretur, & simul Plenilunii temporibus per
Dæmonem comitiali morbo gravissime affligeretur* (a).
Hanc ipsam rem; experientia eorum, quæ hieri
persæpe videmus, confirmat sapientissimus Maldo-
natus. *Experientia enim docet, quanto studio per-
suadere Dæmones conentur, nonnullas creaturas plus-
quam illis natura concessit, habere virtutis* (b).
Ne vero longior adhuc sim, cætera aliorum omit-
to testimonia; quandoquidem his solis, quæ nu-
per dixi, auctoritati propositæ erit abunde, quan-
tum reor, satisfactum.

53. A Medicis ad Chirugos transeamus, quo-
rum facultas, si veteribus fides habenda est, a lu-
nari observatione ne separari quidem debet. Ve-
ritum quoque iis est, Luna plena, caput terebra-
re cerebrum male habentibus, ut humor plus
æquo redundans effluat; quod tum cerebrum dif-
fondatur magis, & tota cranii capacitas lunari
humore impleatur. Idem veteres observandum,
putant, si forte sectio aliqua, vel ustio, vel alia
quævis chirurgica operatio in ossibus facienda sit;
quod ossum medullis Luna potissimum præsit.
Morbis item pituitosis obnoxii ob hanc ipsam
causam (auctore Galeno, aliisque) hujus sideris
vim in primis sentiunt, & una cum eo pituitam
augeri experiuntur: quocirca hydropè laborantibus,
vel quavis alia tumiditate correptis chirurgi ma-
num

(a) *Del Rio disquis. Mag. lib. 3. pag. 409.*

(b) *Apud Schorrum lib. 4. Mir. Energ. c. 10.
pag. 547.*

XLII.

num adhibere, id putatur grande nefas :

54. Hæc, aliaque id genus permulta memorizæ prodidere veteres auctores, in quibus refutandis nolo inanem laborem sumere: satis enim multa, vel plura potius, quam necesse erat, supra diximus, ex quibus jam liquet, opinionem istam arenoso, ut ajunt, fundamento esse superstratam. Id unum præterea addo, quod, ut Lunares influxus in ossium medullas intrent; pervadant, oportet, certam quandam durissimam substantiam, qualis nempe ossea est, ad quam penetrandam certe non valet quicunque humor. Et vero si Mercurium excipiamus, qui exiguos quoscunque humani corporis poros pervadit; ac in intimos ossium recessus usque penetrat, nihil fortasse est, quod vim hanc maximam penetrandi obtineat. Ejus ergo indolis, ac naturæ influxus constituamus, necesse est, ut Mercurii vim, ac pondus exæquent. Quod quis dixerit? Hactenus de iis, quæ ad hominum curationes, & morbos pertinent disseruisse affatim est. Illud superesset, ut de tondendis capillis, ut sub initium innuimus, aliqua diceremus, qui ni, crescente Luna, secentur, periculum est, ut vulgus credit, ne tondentes calvescant. Verum istuc tam futile, tam ridiculum refellere non piget solum, sed pudet etiam.

55. Expendendum nunc est alterum caput, an scilicet Echini; Astaci; Cancræ; Ostrea; testacea omnia, & crustata animalia revera, crescente Luna, augeantur, succulentioraque sint, contra, decrescente, minuantur. Ælianus id affirmavit: *Testa, Crustacea insectorum hoc etiam proprium est, ut*

XLIII.

ad decreſcentem Lunam ex inanitate, & exilitate corporis laborent. (a). Idipſum longe expreſſius docuit Plinius: Jam quidem lunari poteſtate Oſtrea- rum, Conchyliorumque, & Concharum omnium cor- pora augeri, & rurfus minui (b). Idem paſſim ha- bent veteres pene omnes. Perſuaſum nanque iis erat, Lunæ proprium eſſe, corpora quæcunque vitali quodam rore rigare, & modico item calo- re humectare. Enimvero omnium animantium vi- ta a calidi, & humidi commixtione oritur, atque utriuſque temperamento mirum in modum produ- citur, ac fovetur. Ut autem hæc omnia melius conſiſterent, duo magna ſidera, Solem ſcilicet, & Lunam illi præfecerunt, quæ tanto operi faciundo præeſſent. Hinc quemadmodum Sol ſuo calore ma- ximam habet vim in cunctis corporibus caleſcitan- dis; ita Lunæ corpus, tum præſertim, quum abun- de a Sole illustratur, humores omnes alere, ac humido ſuo influxu regere, pro certo ſumebant. Ad id autem magis illuſtrandum, rem perquam ridiculam ponit laudatus Plinius: Sol, inquit, maſculum ſidus, marisque vicem gerit, Luna fœmi- næ, fœmineum enim eſt ſidus, & molle, atque no- cturnum ſolvit humorem, & trahit, non auferit (c).

56. Quod ſi opinionis huius originem longius repetamus, poeticum quoddam Anniani commen- tum, ni fallor, huic opinandi modo fecit princi- pium. Is, inquam, quum quosdam amicos ad

coe-

(a) *Ælian. lib. 9. cap. 6.*

(b) *Lib. 2. cap. 41.*

(c) *Lib. 2. cap. 101.*

XLIIII.

coenam olim invitasset, eisque ostrea admodum gracilia, & exsucta apposuisse; requisitus, unde id esset: respondit: *Luna nunc videlicet senescit; ea re ostrea quoque, sicut quædam alia renuis, exsuctaque est* (a). Quumque rursus urgerent amici, *Cur senescente Luna tabescerent?* Ne diutius penderet, se hunc in modum dissolvit: Nonne Lucilium, inquit, meministis dicere?

*Luna alit ostrea, & implet Echinos, muribus fibras
Et pecui addit.*

Eadem autem ipsa, quæ crescente Luna gliscunt, deficiente quoque Luna deficiunt. (b). Insignem hanc imposturam amplexati deinceps sunt alii Poetæ; propterea legitur,

Ad Lunæ motum variant animalia corpus (c). Et contracto sermone ad crustata dumtaxat animalia.

Lubrica nascentes implent conchyliæ Lunæ (d).

Itaque, quum ita se res habeat, nonne inter Poetarum fabulas, & commenta jure, meritoque & ista opinio reponenda erit?

57. Mitto heic quærere, undenam Lunæ influxus tam incomprehensibilem nacti sint naturam, ut victis omnibus quibuscunque obstaculis, quæ plurima, ut diximus, eorum in terram descensui adversantur, tantam maris aquam adhuc synceri, & incontaminati trajiciant; istorumque

(a) *Apud Aul. Gell. Lib. 20. c. 7.*

(b) *Idem ibid.*

(c) *Manil. lib. 2. Astron. v. 94.*

(d) *Horat. lib. 2. satir. 4.*

animalium testam, seu crustam vel durissimam penetrent, impleantque. Istud, inquam, relinquo; atque ad experientiam, ad quam fortasse provocor, libenter venio. Cl. Robaultius de hac experientia ita scribit: *Falso quoque, & omnino adversante experientia creditum est, Astacos, Ostreas, aliosque pisces, se pro varia Lunæ facie implere, aut extenuare, qui error illac, qua reliqui fere omnes irrepserit.* (a) Id egomet in Echinis plus semel expertus, verum adhuc esse comperi. Sæpius enim, Luna sicca, Echinos prægrandes; ovorum, quæ loco carnis sunt, & succi plenos deprehendi. Contra in Lunæ auctu exsiccatos, & pene omnino vacuos interdum spectavi. Quæ res ne commentitia videatur, & verbis potius fingi, aut mente concipi, quam ita revera esse existimetur; quisque per se, ut certo rem istam perspiciat, id genus experimenti repetere sæpius poterit: sæpius, inquam; nec enim satis habendum, id semel observare. Quod itaque ad experientiam attinet, solum constat, id genus animalia modo esse intus plena, modo plane vacua. Verum quid ita? Sane, ut veram hujus tanti discriminis causam investigemus, non est tam longe nobis abscedendum, ut ad Lunam confugere, sit opus. Illa enim vero heic apud nos est. Siquidem Testacea, & Crustacea omnia animalia, ut cætera quæque, macrescunt, & exsiccantur pro ratione inopiæ, & probitatis pascuorum, nec non locorum constitutionis: Scilicet, vel quod alimentum; quod expetunt eis deficiat,

(a) .Robault. *Phys. Parr. par.2. cap.27. pag.94.*

XLVI.

ciat, vel quod aquæ in quibus degunt, faginandis piscibus minus sint accommodatæ, vel demum quod maris undis, & tempestatibus nimium commoveantur, & verberentur.

58. Superest ultimum partitionis caput: an scilicet quidquam in arbores, & vegetabilia omnia Luna conferat? Equidem hac super re veteres ferre omnes præsertim Marcus Cato, Terentius Varro, Moderatus Columella, alique, qui de re rustica apposite scripserunt, in quolibet ferme rei rusticæ opere Lunam observandam passim inculcant: Idque nostri etiam ævi rustici religiosissime tenent, servantque. Ex istorum iudicio suam unaquæque sementis, ac messis Lunam habet; suam quoque arborum insitio, & potatio; & præterea suam potissimum cædua silva. Ut brevitati consulam; sementem, ac messem relinquo; item potationem, & insitionem prætereo; atque id unum heic refellendum suscipio, quod cæduæ silvæ proprium est, quippe quia res est sermone omnium celebratissima.

59. Mense Novembri materies ad fabricam cædenda est, Luna decrescente, inquit Palladius Rutilius (a), qui mos a maioribus traditus etiam nunc in usu maxime est; nisi quod id tempus ad sequentem Decembris Lunam, item decrescentem nonnulli producant. Quare autem id veteres præceperint, & nunc solícite, ac diligenter nostri rustici observent? Nempe, ajunt, ejus rei causa istuc faciendum est, uti ne arbores cædæ brevi pu-

(a) *Pallad. Rustic. lib. II. tit. XV.*

XLVII.

putrescant, & cariøsæ fiant. Id quod proculdubio contingeret, si forte, Luna crescente, caderentur. Quæ res a longa, ac inverterata omnium temporum experientia confirmata esse, dicitur.

60. Duo igitur in arboribus cædendis observatu digna heic memorantur. Unum; ut cæsis ista non fiat, nisi mense Novembri, vel Decembri. Alterum, ut eo tempore, quo cædi arbores debent, Luna sit decrescens. Primum videtur esse non modo perutile, sed maxime necessarium ad cariem cavendam. Siquidem succus, qui in arborum venis continetur, is potissimum est, qui putrescendo cariem inducat. Quocirca optimum tempus arborum cædendarum æstimatur illud, quo arbores frigore nudatæ rigentes sunt; minusque succosæ. Id quod prædictis mensibus, hoc est hiemali tempore contingere, compertum est. Alterum vero de Lunæ observatione supervacaneum, futile, atque omnino ineptum esse judicamus. Quum enim Luna item iis mensibus decrescat, atque in cæteris: si quidpiam virtutis Lunæ Novembri decrescenti inesset pro arboribus a carie defendendis; singulæ indiscriminatim Lunæ, ubi decrescerent, id ipsum efficere possent. Cur ergo cæteræ omnes extra hiemem Lunæ etiam si peræque deficientes sint, succidendis tamen silvis ineptissimæ omnino censentur? Nempe quia, si hiemem excipiamus, quovis alio tempore plantæ omnes virentiores, ac succulentiores sunt. Quæ major succi copia in causâ est, ut arbores, quæ verno, vel æstivo, vel etiam autumnali tempore cæduntur, facilius, & citius putrescant. Quum igitur ita se res habeat, id

XLVIII.

id solum præcavendum heic est, ut hieme (melius vero sub initium) succidantur arbores ; cæterum sive Luna tum crescat , sive decrescat , enim vero nihil refert .

61. Falluntur itaque , qui trabium non ita antiquorum cariem , vel putredinem ad Lunam referunt ; eo quod alia , atque tempus cædendi postulabat , tum illa fuerit . Falluntur , inquam , propterea , quia hunc effectum ei rei inconsiderate attribuunt , cui minime attribuendus est . Et vero tantas effectus iste habere heic potest causas , quantas non queo dicere . Ut nanque fileam tempus , quod idoneum est ad cædendum , de quo numero proxime superiore satis diximus . Hic sane effectus utique provenire poterit ex vitio soli , in quo arbores natæ fuerint ; vel quod nutriticius humor non rite in illo percoletur , vel quod Solis conspectui sit parum admodum obversum , vel ob aliam similem causam . Ipsa aeris temperies , vel Cœli status , si adversus omnino fuerit , nempe si nimio ardori , vel humiditati , vel frigori , vel grandini obnoxia arbores fuerint , hunc quoque effectum gignere potis erit . Addê huc ægritudines , & morbos ferme innumeros , quibus plantæ omnis generis ex causis tum externis , tum internis affici sæpe solent . Quæ quidem omnia quemadmodum arborum vitam modo breviorē , diuturniorēque efficere nulla certa lege possunt , ita , quum cæsa fuerint , ob eandem ipsam rationem aliæ brevi putrescunt , aliæ vero diutissime conservantur . Atque hæc , & forsitan pluribus dicta sunt , quam exigebat ratio veritatis , minus tamen multis , quam postu-

XLVIII.

postulat prave detorta, & inveterata rusticorum
Opinio.

62. Antequam modum aliquem, ac finem huic
dissertationi, qualiscunque sit, faciamus: Astrolo-
giam metereologicam heic tantillum excutiamus,
oportet, quæ tantæ hujus provinciæ pars vel ma-
xima est: an scilicet aeris, ventorum, temporum-
que mutationes a Lunæ phasibus, aliorumque astro-
rum adspectibus quodammodo dependeant; adeo ut
ista attendentibus pluvias, serenitates, tempestates,
aliasque temporum vicissitudines prænoscere, atque
in futurum prædicere concessum sit. Id affirmant
omnes quotquot sunt Calendariorum compositores,
in quorum verba non pauci antiquitatis studiosi
etiam nunc simplicissime jurant. Quæ nostra hac
de re sententia sit, ex iis, quæ copiosissime supra
diximus, colligi facile potest. Quum enim Luna, ut
ostensum est, nullo unquam pacto, neque lumine,
neque attractione, neque effluvijs immisione
in Terræ atmosphæram agat; neque præterea ul-
lus alius in eam agendi modus illi superesse videat-
ur; qui fieri possit, ut eam ipsam atmosphæram
identidem immutet, non sane intelligo.

63. Me non fugit, Astrologos, eosque omnes,
qui talibus quibusdam astrorum observationibus
plus satis sunt addicti, quibuscunque rationibus
posthabitis, artem suam omnem ad experientiam
revocare. Sed quam jactanter de se id pronun-
cient, quamque vanissime in rem suam ipsi expe-
rientiam vertant; vel ex eo primum intelligi po-
test, quod tantum abest, ut ex certo quodam
astrorum adpectu, & positione certum aliquem
effe-

effectum ipsi sapius observaverint, ut potius asserere liceat, fieri non posse, ut id quoquo modo ab hominibus observetur. Siquidem apud Astronomos compertum, exploratumque nunc est, siderum adspectum, atque ordinem, qui observatus aliquando fuit, vel omnino nunquam, vel nonnisi post permulta exacta annorum millia eum ipsum iterum rediturum. En experientia de eodem recurrente siderum adspectu sapius, ut ajunt, observato.

64. Deinde, si Lunam, ejusque phases spectemus, de quibus, utpote quæ singulis mensibus eadem omnino recurrunt, facile est, observationes instituere: nec ex iis quidquam, nisi inepte vaticinari, fas erit. Quum enim quælibet Lunæ phasis talis heic, atque ubique terrarum contingat sine ullo vel temporis, vel luminis discrimine; quidquid ex ea heic accidere putatur, item profecto ubique acciderit. Jam constat, pluviam, exempli gratia; quam quispiam ex certa quadam Lunæ phasi prædicere sibi sumit, etsi forte usquam dilabatur, eandem tamen per totam Terræ superficiem minime porrigi; quin sapissime experimur, immodicos imbres maximam anni partem in quandam regionem defluere, dum in vicino quodam, atque finitimo tractu maxima est siccitas. Quid ergo est, cur eadem Lunæ phasis ubique præsens, non ubique eodem modo operetur? At enim, Astrologorum vaticinia eventu persæpe non carent? Non equidem inficior. Sed si homines ex rei eventui artem istam æstimaturi sunt; actum jam erit de omnibus Astrologis: quandoquidem, ut optime